

Colliaziun dals territoris da skis Arosa e Lai


Da las tractativas da la regenza grischuna

■ (cc) La regenza grischuna ha approvà ina promoziun finanziaria da la colliaziun dals territoris da skis tranter Arosa e Lai. Plinavant ha la regenza prendì posiziun davart differentas fatschentas en il rom da consultaziuns sin plaun federal. La confederaziun ed il chantun sustegnan la colliaziun dals territoris da skis tranter las duas destinaziuns Arosa e Lai. A la Urden SA vegn concedì in emprèst da la confederaziun da 4 milliuns francs en il rom da la nova politica regiunala (NPR) per il project «Colliaziun dals territoris da skis Urden». Quai cun la resalva che la finanziaziun totala saja reglada. L'emprèst sto vegnir restitui entaifer 15 onns. Sco prestaziun d'equivalenza a l'emprèst da la NPR vegn garantida ina contribuziun chantunala da 928 690 francs.

Tras la construcziun da la teleferica da colliaziun Hörnli–Urdenfürggli davenant ils territoris da Lai e d'Arosa ina regiun da sport da naiv coherenta che tutga tar las pli grondas dal Grischun. Il project «Colliaziun dals territoris da skis Urden» è in project d'infrastructura extraordinari per il chantun turistic. El po dar impuls da svilup impurtants er en ils dus lieu Arosa e Lai. Tras la colliaziun directa tranter ils dus territoris da sport da naiv quintan ins cun ina meglieraziun substanziala da la creaziun da valurs en las duas regiuns.

Publicaziuns uffizialas

La regenza grischuna beneventa la midada proponida da la lescha federala davart las publicaziuns uffizialas. La finamira primara da la revisiun da la lescha è la midada da la forza giuridica lianta da la publicaziun stampada a la publicaziun electronica da texts en la collecziun uffiziala ed en il Fegl uffizial federal. Tenor l'avis da la regenza s'impona questa midada dal primat perquai ch'il primat verent da la publicaziun stampada na reflectescha betg pli las disas actualas da la gronda part da las utilisadras e dals utilisaders e perquai ch'el na correspunda pia er betg pli a lur aspectativas. La regenza beneventa er ils plans da crear ina plattafurma electronica e cumplexiva da publicaziun che duai dar a tut las requirèntas ed a tut ils requirents da dretg in access electronic liber e segir al dretg fe-



deral. En quest connex èsi in grond gjavisch da la regenza ch'ils texts da la collecziun sistematica dal dretg federal, che vegnan purschids en rumantsch, stettian medemamain a disposiziun sin la plattafurma da publicaziun.

Promoziun e la protecziun d'uffants e da giuvenils

La cumissiun per scienza, educaziun e cultura dal cussegl naziunal vulesc rinforzar las mesiras da la confederaziun en la politica d'uffants e da giuvenils. Tras ina cumplettaziun da la constituziun duai la confederaziun survegnir la cumpetenza da fixar princips davart la promoziun e la protecziun d'uffants e da giuvenils sco er davart lur cooperaziun a la politica ed a la societad. Las cumpetenzas essenzialas en il sectur da la promoziun sco er da la protecziun d'uffants e da giuvenils tutgan oz als chantuns ed a las vischnancas. Correspundentamain finanzieschan els er las mesiras che vegnan prendidas en

quest sectur. Er ord vista da la regenza grischuna èsi impurtant da tadlar sco er da laschar cooperar e cundecider la generaziun giuvna e da percepir ses basegns. L'urden giuridic svizzer cuntegna dentant gia oz ina vasta paletta da disposiziuns da protecziun e da promoziun per uffants e per giuvenils. Da cumplettar la constituziun, sco quai che la cumissiun dal cussegl naziunal propona, n'è perquai betg necessari ord vista da la regenza.

La regenza sustegna in rinforzament da la medischina da chasa

La regenza grischuna prenda posiziun tar la revisiun parziala da l'ordinaziun federala davart l'assicuranza da malsauns. La regenza sustegna l'emprim punct da questa revisiun parziala, numnadamain l'adattaziun da las cundiziuns d'admissiun per il labor pratic. Uschia po la media responsabla u il medi responsabel far en l'avegnir tshertas analisas ordaifer las localitads da l'atgna pratica, cur ch'ella u

el visita la pazienta u il pazient a chasa u en la chasa da persunas attempadas u da tgira, e quintar giu questas analisas sin donn e cust da l'assicuranza obligatorica per la tgira da persunas malsaunas. Questas analisas, che vegnan fatgas cun agid da strivlas da test u da pitschens apparats purtabels, portan resultats entaifer paucas minutas, quai che facilitescha ed accelerescha la procedura da diagnosa e da terapia. Tenor l'avis da la regenza rinforza questa midada la medischina da chasa ed ella correspunda ad in cler basegn.

Il segund punct da la revisiun parziala pertutga l'admissiun da neuropsicologas e da neuropsicologs sco furnituras e furniturs da prestaziuns da la lescha federala davart l'assicuranza da malsauns. Cunquei ch'ina proposta concreta per circumscrivere las prestaziuns da las neuropsicologas e dals neuropsicologs n'è betg anc avant maun propona la regenza da sistir la dumonda da l'admissiun fin lura.

La confederaziun ed il chantun sustegnan la colliaziun dals territoris da skis tranter las duas destinaziuns Arosa e Lai.

MAD